



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მეორე სოციალისტური ინტერნაციონალი

მეორე სოციალისტური ინტერნაციონალი, სოციალისტური ინტერნაციონალი, მშრომელთა ინტერნაციონალი (1889—1923) და საქართველო, მუშათა საერთაშორისო პარტიების გაერთიანება, რომელიც დაარსდა 14 ივლისს პარიზში, საფრანგეთის რევოლუციის მე-100 წლისთავთან დაკავშირებით მოწვეულ ყრილობაზე. მისი შექმნის წინაპირობა ევროპის უმეტეს ქვეყნებში სოც.-დემ. პარტიების ჩამოყალიბება და ასევე პირველი ინტერნაციონალის, როგორც ბენაციონალური პროლეტარული ორგანიზაციის გამოცდილება იყო. მიუხედავად იმისა, რომ მ. ს. ი. ევროპულ ქვეყნებს შორის ომის წინააღმდეგი იყო, პარტიების უმეტესობამ საბოლოოდ გადაწყვიტა, მხარი დაეჭირა თავისი სახელმწიფოებისათვის პირველ მსოფლიო ომში (1914–18). მ. ს. ი. ფაქტობრივად 1914–18 აღარ ფუნქციონირებდა.

ომის დამთავრების შემდეგ, 1919 წ. 3–10 თებერვალს ქ. ბერნში გაიმართა კონფერენცია, რ-შიც მონაწილეობდა სოც.-დემ. პარტიების უმეტესობა. მიღებულ რეზოლუციებში საუბარი იყო მ. ს. ი-ის აღორძინების დასაწყისზე. საქართვე. სოც.-დემოკრ. პარტიის დელეგაციამ კონფერენციას წარუდგინა რეზოლუცია, რ-ითაც ითხოვდა მ. ს. ი-ის მხარდაჭერას საქართველოსთვის დამოუკიდებლობის აღიარების (დე იურე) პროცესში. კონფერენციამ მიიღო შესაბამისი რეზოლუცია და მოითხოვა პარიზის სამშვიდობო კონფერენციისგან საქართვე. დამოუკიდებლობის ოფიციალურად ცნობა. 1920 წ. 31 ივლ.-4 აგვ. ჟენევაში ჩატარდა მ. ს. ი-ის მორიგი კონფერენცია, რ-მაც საქართველოში ოფიციალური დელეგაციის გამოგზავნის გადაწყვეტილება მიიღო. გაეცნობოდა რა საქართველოს პოლიტ. ვითარებას, ინტერნაციონალი ზეგავლენის განხორციელებების გზით შეეცდებოდა, დიდ სახელმწიფოთა (ანტანტის) მთავრობებს ეცნოთ საქართველოს დე იურე დამოუკიდებლობა. დელეგაცია ჩამოვიდა 1920 წ. 14 სექტემბერს. მასში შედიოდნენ დას. ევროპის სოც.-დემოკრ. და მუშათა მოძრაობის გამოჩენილი ლიდერები: დიდი

ბრიტანეთიდან – ჯ. რემზი მაკდონალდი, თ. შოუ, ქ-ნი ე. ენეკინ-სნოუდენი; საფრანგეთიდან – პ. რენოდელი, ა. ინგელსი, ა. მარკე; ბელგიადან – ე. ვანდერველდე (მეუღლესთან ერთად), ჟ. ჟ. ჰიუსმანსი (მეუღლესთან და შვილთან ერთად) და ლ. ბრიუკერი. ავადმყოფობის გამო დელეგაციაში არ იმყოფებოდა მ. ს. ი-ის ლიდერი კ. კაუცკი, რ-იც საქართველოში მოგვიანებით ჩამოვიდა თავის მეუღლე ლუიზასთან ერთად.

დელეგაცია ბათუმში ჩამოსვლისა და ქალაქის დათვალიერების შემდეგ გამოემგზავრა თბილისში. საქართვე. მთავრობამ 15 დეკემბერი უქმე დღედ გამოაცხადა. დედაქალაქში შედგა დამფუძნებელი კრების რიგით 51-ე საგანგებო კრება, რ-საც სტუმრები ესწრებოდნენ. სხდომაზე მისასაღმებელი სიტყვებით გამოვიდნენ დამფუძნებელი კრების თავ-რის ამხანაგი (მოადგილე) ა. ლომთათიძე და ყველა პარტიული ფრაქციის წარმომადგენელი (გ. გიორგაძე, შ. ალექსი-მესხიშვილი, გ. გვაზავა, გ. ვეშაპელი, ლ. შენგელაია, გ. ტერ-სტეპანიანი). შეხვედრის შემდეგ დელეგაციამ იმოგზაურა ქვეყნის არაერთ კუთხეში, სადაც ხვდებოდა ქალაქებისა და სოფლების მოსახლეობას. სტუმრებმა ათი დღე დაჰყვეს საქართველოში. ისინი ყველგან ხვდებოდნენ ხალხის აღფრთოვანებულ და სტუმართმოყვარე განწყობას – იმართებოდა საზეიმო სხდომები, მიტინგები, იშლებოდა ტრადიციული ქართული სუფრა.

დელეგაციის წევრებმა სამშობლოში დაბრუნების შემდეგ მრავალი სტატია, წერილი თუ პუბლიკაცია გამოაქვეყნეს ევროპულ პრესაში; მოაწყვეს შეხვედრები, მიტინგები, კითხულობდნენ მოხსენებებს, რ-ებშიც არ ფარავდნენ ემოციებს ქართვ. ხალხის ბუნების, საქართვე. დამოუკიდებლობის მხარდაჭერისა და ქართ. დემოკრატიის დაცვის აუცილებლობის შესახებ, რ-საც აგრესიის საფრთხე ემუქრებოდა დიდი მემობლებისაგან. მაგ., ინგლისურ გაზეთ „ტაიმსში“ დაიბეჭდა ქ-ნ სნოუდენის ინტერვიუ; ლონდონის ყოველკვირეულ „დე მატენში“ — მაკდონალდის სტატია „სოციალისტური სახელმწიფო კავკასიაში“; ბელგიურ გაზ. „ლე სეირში“ — ვანდერველდეს ინტერვიუ; ფრანგულ „ლე კრი დუ ნორში“ – ა. ინგელსის მთელი სერიალი საქართველოში მოგზაურობისა და განცდილი შთაბეჭდილებების შესახებ და ა. შ. სავარაუდოა, რომ მ. ს. ი-ის მხარდაჭერამ და დას-ის ქვეყნების სოციალ. პარტიებისა და მათი ლიდერების მიერ საქართვე. დამოუკიდებლობის საკითხის პოპულარიზაციამ მნიშვნელოვანი გავლენა მოახდინა ევრ. სახელმწიფოების მთავრობათა და ანტანტის ხელმძღვანელობაზე, რ-ის შედეგიც იყო საქართვე. დე იურე დამოუკიდებლობის აღიარება. ვიზიტის დღეებში გადაიღეს ოთხნაწილიანი დოკუმენტური ფილმი — „ევროპის სოციალისტური დელეგაცია საქართველოში“.

მ. ს. ი. საქართველოს ოკუპაციის შემდეგაც აქტიურად უჭერდა მხარს ქვეყნის დამოუკიდებლობის აღდგენას და გმობდა საბჭოთა რუსეთის მიერ მის დაპყრობას. 1921 წ. 22 ნოემბერს მ. ს. ი-ის აღმასრულებელმა კომიტეტმა თავის სხდომაზე მიიღო საქართვე. მხარდამჭერი რეზოლუცია. აქ აღნიშნული იყო, რომ ქვეყანა დაიპყრო მოსკოვის ჯარებმა, ხოლო მოსკოვის მთავრობამ ქართვ. ხალხს დაუნიშნა უცხო ხელისუფლება, რ-საც

პასუხისმგებლობას აკისრებდა საქართვე. რესპუბლიკის განადგურებაში, ტერორის რეჟიმის დამყარებაში და მოითხოვდა რუს. მთავრობის ჯარების გაყვანას ქვეყნიდან.

ლიტ.: ბ ე ნ დ ი ა ნ ი შ ვ ი ლ ი ა., საქართველოს პირველი რესპუბლიკა (1918-1921 წწ.), თბ., 2001; კ ი რ თ ა ძ ე ნ., ევროპა და დამოუკიდებელი საქართველო (1919-1923), თბ., 1997; ევროპელი სოციალისტების ვიზიტი საქართველოში 1920, [ტ.] 1, თბ., 2022.

დ. შველიძე
